



金文通公集卷之二十

吳江金之俊豈凡著



前中順大夫廣西柳州府知府念孚吳公暨元
配敕封安人陶氏合葬墓誌銘

公諱士顏字元復號念孚其先世自秦伯仲雍以來
因國爲氏宋端平中有千一公卜居松陵之六子橋
北此吳氏之始遷祖也越六世有伯昂公諱昂生孝

子廷用公諱璋。以子貴。俱贈中大夫太僕寺卿。先是廷用公妣陸氏。孀居守節。明永樂年間。選入內廷。給事宣德元年。淮王出封韶州。又改封饒州。陸隨焉。廷用公思念久之。因棄家走京師。復走二藩。經歷艱苦。至正統十二年。見母時。已病篤。引至旅次。三日而卒。扶襯歸葬。世稱全孝翁。公五世祖也。四世祖少保公諱洪。第成化乙未進士。歷任南京刑部尚書。迺逆瑾勒令致仕。卒。贈太子少保。予祭葬。曾祖少保公諱山。正德戊辰。同弟巖登進士。初仕刑曹。諫武宗南巡。詔

廷杖。歷撫河南四川南贛。有政聲。晉刑部尚書。執法不避貴倖。斃武定。郭助于獄。忤旨。奪官。至穆宗朝。復原官。進階宮保。祖蒙泉公諱邦棟。佐父居官。以廉節著。篤友。諸弟盡以少保。公官橐歸之。身惟課誦孜孜。不輟。以次子方伯公承壽貴。封吏部郎。加封山東左叅政。父孚泉公諱承烈。早遊黌序。繼入太學。有文名。晚益嗜古。樂善好施。予閩黨咸推重之。性慕竺乾。邑中梵宇。屬公興葺居多。迄今歷歷名剎。猶指孚泉公也。以公貴。贈承德郎南京刑部江西司主事。嫡母陶

氏係禾中名族。公及弟孝廉公士莘皆生母周氏出。推恩俱贈安人。初孚泉公艱于嗣。虔禱有奇驗。連舉二子。長卽公也。生而岐嶷。志氣卓犖。非凡兒比。嫡母絕愛異之。如同已出。六齡就外傳。行止如老成人。習句讀。學益加進。公故陶氏甥。公母與陸莊簡夫人同產。莊簡見而異之。曰：長甥如雪峰千仞。嶄然特峙。次甥如藍田美璞。光輝外著。當共寶之。陶翁欲擇壻。誰踰此陶。因以女字公。以兄衛幕公女字仲嫡。母旣愛二子。自是念深。瓜葛尤加提挈。年十三。學業已就。每

成一藝。塾師輒加欣賞。值嫡太安人喪。哀毀如禮。服闋。就試。昆季偕補博士弟子員。時督學陳公課士。謹獨以國士目公。于是公益自奮。青燈苦吟。丙夜不輟。歲癸卯。科錄士。郡伯不能理。士林怏怏。未敢輕發。公毅然首抗。同舍生從之。竟罹法網。時邑宰西蜀劉公。賢明有治略。憐公才。重爲寬解。得從薄鐫。由是公鍵戶攻苦。昆季更相拈究。爲文務以理勝。曰：讀書不能窮理。廼掇拾餽釘。取科第乎。益優游靜業。窮通得喪。寘之度外。歲丙午。闈試不售。而研苦不輟。未幾。孚泉

公一病不起。公哀毀骨立。迨壬子。復遭母周之喪。哭泣無常時。常悲涕欲絕。公既失怙恃。資館穀于外。不問家計。惟肆力于學。乙卯科試。昆季俱以戴經領鄉薦。並出楚江。何君薦可房。兄弟同門。誠一時盛事也。丙辰禮闈。與仲君同赴公車。試罷。仲君竟歿。公亦下第。自是每困公車。因念先人庭訓切苦。不得邀祿養。幾終老風塵間。更不得寵綸身後乎。爲之泣下。丙寅入南雍。爲司成所賞識。每冠多士。辛未得除目。令閩漳之南靖。靖故枕山帶海。地瘠民澆。素稱難治。且鄭

帥稱兵。無有寧日。公虛懷質採。得前令及漳紳之在京邸者。周諮利弊。洞若指掌。公欣然曰。吾已知所以治之矣。壬申之任。渡青溪。踰仙霞。靖役供應具相迎馬首。公諭之曰。抵靖尚千里而遙。計費不貲。豈不取償。吾靖民哉。煩應奚爲。以囊貲給遣。至漳謁各臺。卽痛切言之。樹碑釐革。送迎虛費。已廉聲寢寢。聞海陬矣。公故知靖習最敝者。如服毒誣詐等情。于凡訟者。躬親驗視。再三諭意。俾母輕生。結釁訟者。感動而敝俗爲之一更。又催科若陵工糖稅等。尤爲民害。于是

給辦陵工。蠲除糖稅。他如典餉等項。將板鋪馬贍充解者。一切峻革。又清出攬解銀匠蔡梧等。侵得寺租銀二千餘兩。由是神明愷悌之望赫然。尤加意詞訟。念風俗多詐。而狼役刁黠之民佐之。民至傾家破產。公于聽讞。洞得其情。數言剖決。風行雷厲。兼以仁恕于。是奸詐不得行。而公庭若虛矣。及夫公門勾幹。加意嚴飭。鄉閭之中。無有叫譁。以妨民事。由是政治人和。年豐歲稔。旋鼎新縣治。則樂輸子來。無煩徵召。民視公事如家事矣。莅靖之日。值平和。考塘峒山等處。

羣盜嘯聚。遠近震驚。公奉檄進勦。夙與兵使者意氣相許。共以恤民爲事。公深入寇阻。不折一矢。俄而渠魁剪除。分別脅從。全活以萬億計。若蘆溪銅皮之間。保全尤大。和民歡呼。致當道願割其道里以屬靖轄。他日公偶經其地。民咸呼聚曰。公真我父。活我。我無以報公。環相泣拜。輿不得前。此詰亂安民之尤著者也。靖故人文之地。公科季二試。加意蒐羅。大抵數科所第之士。多由公簡拔。臺使躉之。癸酉十月。疏留公覲兼攝龍溪篆。公一以治靖之法治之。凡在郡十之

六在邑十之四。分身以應。沛然有餘。龍民祝公。如靖民焉。惟公雅意虛公。請益不惜。爲民博訪。而尤絕私請。是以漳居閩海之遠。惠聲善政。因事而呈。皆足不朽者。以此調任漳浦。會疏寢不覆。時朝議城使之擢。係輦轂重地。必于知推中。擇賢能者居之。于是主銓以公名上。因有南司城之命。時公莅靖三載矣。三邑尸祝。公而朝推之屬。公又會海寇劉香平嶺南錄叙。皆膺上考。公曾繫其母于獄。屢獲奸細。得紀錄焉。是以屬公司城解任南旋。漳民不遠千里。纍纍然望。望

瞻盼。公亦泣下久之。赴留都任。值獻賊窺江北南都。戒嚴公司北城事。石城三山一帶。屬公統轄。公外護陵園。內輯奸細。自秋及冬。晝夜登陴。衝冒霜雪。臺省因是服公遠略。且省中有欲與公修隙者。伺察公反。得公幹濟才。特疏以薦。是以冢宰有才幹賢能器堪大用之覆咨。取赴部。授南刑部江西司主政。命下之日。大司寇喜得公至。以公居漳時。讞獄有聲。由是諸所奏當。悉屬參閱。多所平反。廉慎寬和之名。赫起一時。會有科臣貪恣不法。公訊鞫無顧避。詰賊巨萬。蠹

役戍邊。庭審時。有臺使欲加黨護躡位而進。公從容語曰。豈不聞南北異體耶。吾一人不敢廢三百年舊規也。某遜謝如位。讞畢。則速攜爰書求減死。而公早以成案報。竟棄市。其丰裁矯矯。不避怨對。有如此大司馬范公景文。雅契重公。拜疏推公武選。會范公以事罷職。疏格不上。仍刑曹郎如故。有內府勲貴爭侵蘆洲。公不畏權勢。清釐民佃。歸課于朝。時方飭錢法。有計曹郎鼓鑄違制。牽引少司農。公堅持不少貸焉。公立意公平。濟以仁恕。雖時奉法者。往往務深刻。以

副功令。乃獨引情據法。不輕進退。怙惡者雖細必懲。災眚者爲之洗沐。大司馬李公邦華署司寇事。嘗擊節歎曰。治獄如吳郎。中天下無冤民矣。庚辰拜柳州守。柳故居山谷之間。民困尤甚。積逋爲多。先時長吏以法懲之。民無所措。又諸徭雜處。不以法繩之。不得盡以法繩之。亦不得。公爲加惠。輯其流徙。潤其凋枯。威德並行。雖山陬海澨。鳥言椎髻之倫。歡忻頌仁守焉。于是力請于臺。議蠲逋賦。議除開礦。情辭懇懇。不憚再三。因悉得報罷。而柳民之困稍蘇。浹月兼攝分

守時楚氛方熾所在震鄰當事紛紛爲備守計措餉調兵公私騷動公惟審度要害遠偵探厲兵甲寧晏不動豪右弄兵爲民害者以法戢之自是諸存不驚右江莫安公之力也二州十邑之吏趨庭受事公朝夕嚴戒務以安靜寧謐爲志而廉恕達于長吏矣時有巨豪某控據要津輒起大獄官司畏其氣焰莫敢追捕公召寘于法境內惕息辛巳例計京朝官公前任司城司城體較京秩稍屈銓曹司馬禮皆行屬且故事職方主司城賢否槩有候饋公寵辱聽之略不

經意于是曹郎不悅署公浮躁臺省素重公僉曰豈有老成練事如吳公而言是哉力爭不得公卽解綬歸蕭然自適絕無芥蒂公素志高曠在白下刑名繁錯而才識有餘胸次嘗磊落暇時則與二三同志尋山問水搜覽長十桃葉之勝建僧菴于上元門外登臨寄眺嘯咏終日及歸築斗室于居第之旁疏泉壘石雜蒔花竹當風日清美與故人流連飲讌桑麻村徑徙倚盤桓人世富貴之榮名利之事毫不掛于胸次至邑有政治係民間利弊者必調度協宜所言皆

洞豁事理。當事深相敬奉。或先事造廬以請。邑民賴之。甲申乙酉間會際。

皇清興。運濱湖寇盜嘯聚。公為當事。歷陳消弭戢亂之方。并邑寧晏。惟公之條議居多。辛卯大浸稽天。歲供難繼。公首詣各臺懇籲。

恩蠲。陳詞款款。竟邀減折。時公已病。猶上書確論灾荒。俾通邑均沾。民咸頂祝。始全孝翁祠。未列祀典。公竭力懇臺。獲與俎豆。公有姊少寡。每重其苦節。為給薪水。為求美材。既歿。撫視含殮。號泣浹旬。視諸姪如已。

子幼而孤者。婚娶教育。挈以成立。並列膠鬻。至于貧交疎屬。饑者待以炊。婚者助以采。死者貽之槨。周恤無虛日。其篤厚。宗族周惠。鄉閭慷慨而前。不惜貲力。不枉道于人。不因利于己。惟倜儻光明。施助勤懇。皆如此類。生平博綜羣籍。尤熟朝家典故。郡邑錢賦。手訂律書一帙。司讞者爭奉以為式。是以事當煩劇。神益閑暇。少從父侍紫栢老人。深得性宗。終身奉之。弗渝。是以能解脫塵縛。應事光明。一切禍患。死生之故。無所繫累。易簣之際。神清氣定。和色歡容。安詳而逝。

自非信根道力未易及此元配安人陶氏閑靜有儀事舅姑以孝聞公未仕時嘗事館穀負笈于外又性樂爽噫不耐家務一切米鹽日用皆由內給安人經畫有方儉中禮節日集家衆篝燈紡績成女紅以佐不逮故公得肆力於學以成其四方遠大之志及公筮仕安人綜理家事不煩內顧致分分服官慮俾益樹廉介之操遇事侃侃無所退阻安人婦德之修皆足備彤管列壺政也按公曾叔祖二千石春塘公與余高祖月用公同嘉靖戊子賢書及公大父封叅政

公爲中丞毛礪菴公之外孫而余曾大母爲礪菴公之孫女中表娣弟故公伯氏方伯少泉公爲余曾大父快壻自是婚姻年誼枝連葉附憶余已未公車偕公北上公奇識偉論試藝高卓推吾邑中第一而竟詘于一第然公歷仕英能偉績雖時名士往往遜謝弗遑余服公素行久矣後以弱息字仲君焉夫余與公又豈特婚媾之相知已哉因爲公志其墓而併系之銘銘曰

卓哉吳公松士所瞻慷慨卓犖玉立修髯與物以和

制行惟嚴。莅彼漳邑。朝推明廉。翼翼金陵。屬公城守。石頭三山。式遏亂寇。兵略旋昭。秋曹簡授。慈以行律。奸慝罔漏。迨守西粵。柳民惠來。克寬克仁。以除其災。蠢爾蠻獠。忠信實推。聞公去柳。謹囂如雷。吳山蒼蒼。湖水泱泱。公歸卜築。嘯歌徜徉。利濟松土。扶災救荒。勒此貞珉。千載不忘。

誥贈朝議大夫涵真郁公暨配韓太恭人合葬墓誌銘

康熙六年歲次丁未秋七月。武塘大廷尉光伯郁君。函其考。

誥贈朝議大夫涵真公行述暨

誥封太恭人韓太君節略。屬余為合葬誌銘。余與郁君交甚善。誼不能辭。按郁氏始祖魯大夫諱貢。世居兩河之間。子姓蕃茂。扈宋室南渡。析居婁江雲間。武林苕水。煙樹相望。一居武塘。奮跡詩書。孝廉明經。累葉

不絕。明洪武初。九世祖子英公諱秀一。以諸生號素封。有司報克塘長。公伏闕條上機務十餘事。稱上旨。因命其僕郁阿孫代公役。復其身。賜其老。艷稱異數。云子英公生彥實公諱信。明經官至郡丞。彥實公生益齋公諱謙。鄉貢士官別駕。益齋公生識菴公諱湛。識菴公生成菴公諱瑾。俱積學不仕。成菴公生東槐公諱鉄。邑庠生。年八十餘。好讀書不倦。能細楷。東槐公生和川公諱本宗。字子序。性至孝。官吉水令。諡貞孝先生。袁了凡先生為立郁孝子傳。曾兩次割股療

父病。因感異夢。病瘥。仍延齡一紀。和川公生二子。長斗山公諱體元。次即大廷尉光伯君考。諱調元。涵真公也。幼聰穎。不習嬉戲。治毛詩。目數行下。年十五。就試學使者。拔童子冠軍。有英異之目。屢試輒高等。遂食餼。然不以文藝自詡。尤務德行。凡立身行已。求合古人法度。里中咸矜式焉。年三十七。適鄰家失火。延及門閭。風烈火猛。不得出。公從酷燄中負母陸。太孺人踰垣走。屢蹶。屢起。又涉河而北。經半里許。乃得脫。蹈火涉水。膚肉盡裂。太孺人喘稍定。撫公而歎曰。生

兒者母也。今母之得生。又以兒也。比和川公宦成歸。治第析爨。堂構聿新。公請居祖遺環堵。而以新居華美者讓之。伯兄兩高堂喜甚。曰。能守吾三百年故廬者。吾季子也。時新舊居相去數十武。公偕前配陸太恭人請曰。昔有負米百里以養親者。今兩大人安居于此。省男負米之勞。敢不專奉菽水。而必就養伯兄乎。堂上許之。殫心甘旨。罔有弗恪。已而伯兄宦遊湘潭。陸太孺人疾作。公嘗藥以進。夜不假寐。前太恭人亦未嘗刻離左右。病者多怒。小不如意。恒厲聲叱。惟

合涕掩袂。伺進湯飲。太孺人病起。喜謂前太恭人曰。能順適我意。起我沉痾者。實賴季婦也。時公得賢內助。治內治外。肅若朝典。業日以擴。公嘗書座端有云。毋捐人利。已毋屈已。諛人毋懷小忿。傷至親。毋競錐刀。貽遠患。與同里諸名流顧公際明。馮公盛典。莊公則孝。十數人。日以文章道義互相切劘。已而顧馮諸公皆後先成進士。為顯官。公獨韜宿抱。屢困有司。僅以廩例遊太學。有勸公考職者。謝曰。父母在堂。雞肋非所慕也。優遊鯉庭。晨昏定省。不踰戶一步。年四十

三和川公年七十八。以壽考終。越五年。陸太孺人年八十四。相繼捐館。公號泣擗踊。痛不欲生。勉營喪葬。戚易如禮。廬墓者三年。哀毀骨立。同學錢顧諸公。往詣墓所。聞哭聲甚哀。低徊不能入。爲咨嗟歎服者久之。服闋還家。語前太恭人曰。自吾二親之亡也。晝則見之于思。夜則見之于夢。如生如存。祭饗以時。靈冉冉其來矣。敬之哉。又以父母不可復見。見兄嫂如見父母焉。公之事長兄如事父。前太恭人事其妣。亦如事姑。其一門孝友之性。沉摯纏綿。有如此。公年五旬。

未有子。前太恭人禱于神曰。婦失德。與何胤嗣之艱也。爲公納二寵。逾年不育。前太恭人竟憂之嗣。成疾。中道先歿。公旣喪賢助。不啻失左右手。哭之哀甚。義不再娶。族人以承祧大事。羣相勸勉。不獲已。知松陵韓氏有世德。令聞聿彰。闡教遂結禱。爲韓太恭人賢而多能。家政肅慎。公于是無內顧憂。赴部候銓。有秉銓某遣人招曰。載贄來可得邑宰。公笑而拒之。卒置縣佐。年五十三。選授貳儀封。公怡然無愠色。時邑宰爲陽羨盧公諱立志。余好友大中丞盧九台先生之。

王父也。能知人深器公。邑有大荒奇獄。必就正而行。所嘉惠地方者。非一端。皆公之德。而百姓不知也。歲丁未。公年五十有五。始生光伯君。邑之紳氓。爭舉手祝曰。願異日者。如盧公來令儀。因命乳名曰儀。公職司河務。是年秋。水大決。親馳決口。相機濬築。調度得宜。畚鍤雲集。河流遂賴以平。先是沿河郡邑。共辦柳梢。每丁數十束。百姓苦之。公請于盧公。通計邑中。游手者幾何。負販者幾何。役于官署。坐食者幾何。合算得農民之半。令游手者出力。負販者出息。在官者免。

其役。伐柳梢以應河工。是以農不困而河有濟。重葺請見亭。爲士子絃誦游息之所。相與賦詩論文。登其雋者以告宰。一時士習文風。蒸蒸霞蔚。公之吏才遊刃政事。文章兩擅其美者。有如此。秩滿遷遼陽前衛。經歷。須行。盧公率紳衿耆庶。祖餞郊關。扶筇跨竹。洒淚追隨。甚而繪像志思。至于車馬之駢闐。壺觴詩軸之繽紛。錯列有如韓昌黎引二疏故事。美楊少尹所云。公卿設供。張祖道都門外。車數百輛。道路觀者多。歎息泣下。共言其賢者。無以異也。是年庚戌冬。側室。

何孺人。生次君之采。歲辛亥。韓太恭人又生三君之
煒。公益喜曰。向者苦乏嗣。今得三子。吾何憂。爰以家
事畀太恭人。竟單車赴遼陽任。時邊備久弛。公銳意
整頓。爲之嚴汛守。蓄戰士。儲糗糧。廣芻牧。更倣古金
城方略。請于上官。召丁壯。給牛種。耕具。墾田萬餘畝。
接濟軍需。凡所以恤兵撫民。籌畫畢至。邊徼頓有氣
色。公才優。簿書又諳。軍務者有如此。三載考績。拜徵
仕郎。適里有豪猾。侵及久安之祖塋。公發憤致政歸。
庭訴甚力。卒罪侵者。而塋兆始安。歲乙卯。三子同入

家塾。幼之煒尤敏慧。善屬對。奇句驚人。公愛甚。恒撫
之于膝。邑侯徐公儀世。式公德望。舉鄉飲大賓。固辭
不允。一時子姓二十餘人。皆青青子衿。執事賓筵。觀
者榮之。往年同學諸公。絡繹歸老。繼洛社耆英之會。
推公主盟。每佳辰令序。月下花前。或池榭登臨。或扁
舟容與。觴咏並舉。管絃雜陳。興盡乃還。致足樂也。會
丙辰四月下浣。公最愛之幼子。忽以痘殤。不勝痛惜。
自是傷中七情。抱疴遂劇。醫藥罔效。竟不起。臨易篋
時。執廷尉昆仲兩手。歎曰。祖德未揚。不可死。兒幼未



原件短缺

P17

教不可死。瞪目視韓太恭人曰。幸兒輩有母在。必能教子有成。光大吾宗。吾可以死矣。但死不忍遠。吾父母當營窀穸于先壠東隅。爲抱母墳。取抱持勿離之。義言不及私。從容而逝。嗚呼。按公之生平。本末敦倫篤行。得之貞孝先生之家學。故能奮不顧身。脫母子烈燄之中。廬墓三年。依親于死亡之後。且思父母因而念兄嫂。敬兄嫂一如事父母。至遺命作抱母墳。尤徵至孝性成。始終不渝。此真務本之君子。與若小試幕寮所至。政成譽起。特公緒餘耳。公之足以砥俗維

爲廷尉君兄弟。延師選配。區畫周詳。于是贈公歸自遼陽。入門。門無廢事。入塾。塾有良師。問穉子。子有佳姻。因歎曰。賢哉母也。恒與同學諸公里社。燕集太恭人爲之佐饗。殮必腆。以潔歲時享祀。必誠以敬。贈公顧而樂之。曰。起吾兩大人于今。其治家綜覈。亦不是過矣。逮贈公捐賓客。太恭人號痛幾絕。曰。未亡人所。以忍延視息者。以撫二藐孤耳。煢煢母子。形影相弔。路人亦爲酸心。獨贈公猶子某。聽訟師謀。以前太恭人未有子。曾立繼。興波搆詞。甚而擒僕逼產。無所不

至官差絡繹于門外。族孽盤踞于室中。太恭人臨機應變。不失毫芒。會邑有賢侯吳公道昌。太恭人攜兩孤。匍匐泣訴。侯片言折之。族孽始俯首伏辜。乃贈公喪。甫免。廷尉君兩庶母。又相繼殞。太恭人拮据殯殮。寧厚毋薄。自贈公與前太恭人暨三側室。五喪待葬。悉萃其責于太恭人。又爲廷尉君兄弟授室。費且不貲。一時吉凶大禮。獨以一女流仔肩。厥惟艱哉。明季織造中官。勢燄甚張。族仇銜夙恨。乘機中傷。竟以廷尉名投認堂。長幾于覆巢破卵。太恭人百計搜措。多

金。幸脫重役。又值縣大造黃冊。胥吏矚孤寡。可噬報充縣總。需索支應。罄捲所積。甫竟二役。又代納匪人包侵之糧。重完富豪已償之債。疊膺苦累。萬緒千頭。因呼兩孤泣戒曰。我子孫貧。勿借債。富勿放債。惟努力讀書。以繼父志。以振家聲。庶不負我艱難險阻之備。嘗耳訪延名師督課。雞三號卽起。漏三下方寢。每夕篝燈十餘處。率婢女數人。勤紡績以待。又必稽察晝夜之所誦習。毋令緩急失宜。及兩孤已能文。太恭人止不試。曰。驚名躁進。有損無益也。每中夜歎思。以

五喪未葬爲疾。遵先命于祖壠之東。刈草開山。經營三月。而佳城告竣。五喪以次襄事。皆太恭人之力云。自丙辰至丁卯。凡十餘年內。大喪之後。繼以大訟。大訟之後。繼以大役。大役之後。繼以大葬。大葬之後。繼以兩婚。而太恭人之考妣相繼辭世。又爲之竭蹶。喪葬心力交瘁焉。嗚呼。按太恭人之所爲。卽以丈夫子當之。有計殫力絀。困不能支者。竟不越閭闔而辦之。裕如已。而廷尉君昆玉蔚然成立。孫枝亦漸次蕃茂。歲已卯。廷尉君登賢書。而後太恭人喜可知也。自是

家有寧宇。先業可保。勿墜已。贈公伯兄斗山公已歿二十餘年。併原繼配三喪。其孽子貧不能葬。太恭人又于祖塋穆穴。造三壙。合葬之。里中薦紳先生咸敬慕有加。曰。太夫人禦外侮也。若此。撫孤有成也。若此。能不念舊惡也。若此。賢哉。賢哉。凡爲婦者。洵當以郁太夫人爲法。廷尉君子順治己丑成進士。太恭人命之曰官。無內外。以憐恤孤寡爲第一義。蓋身丁其苦。言之有餘悲也。由西曹郎游陟大理丞。敷歷中外。所至有聲。一稟太恭人之教云。丁酉郊祀禮成。

恩晉廷尉四品階贈公如其官太恭人得受今封光伯君已具疏乞終養突以闡事株累被譴太恭人能以義命自安不爲色動曰吾自先大夫之亡罹此百憂富貴既非吾有患難亦若浮雲耳癸卯廷尉君以工贖歸省太恭人益色喜乙巳奉工部檄入京太恭人竟以疾革嗟乎婦道母儀至太恭人而醇備極矣余老人雖未獲多讀書間嘗流覽古今來貞婺淑媛諸傳記有如大恭人者既秉含冰茹檠之節又饒捍患解紛之才經理葬婚之大典誨育兒孫以有成千百

中罕得一二也惜乎贈公之不及見也宜其與贈公並垂不朽也已銘曰

矯矯郁公率履古人忠信爲質孝友立身如松之勁如玉之純裂膚蹈火護救其親出佐儀邑民忘公仁叅籌幕府闢土興屯位不期高澤普及民矢公盡瘁無忝王臣解組來歸知幾其神登覽賦詩絃歌錯陳碩抱未竟時命遭屯臨歿不亂戀母諄諄囑葬母側扶抱秋春纘承孝裔存歿惟均克相夫子實賴恭人恪慎柔嘉婦道鮮綜理內外摯裘領振五十餘載

茹檠含辛。塋婚大典。咄嗟攸臻。外禦其侮。罔或逡巡。
大昌厥後。苦緒聿伸。有子綰綬。寵膺綽綸。卓哉賢母。
降鑒穹旻。千秋百世。永茲珉金。石可磨。吾銘不泯。

封文林郎陝西道試監察御史天全陸公墓誌

銘

吳地名家世族。自漢魏而下。代有聞人。顯仕雲初。濟
美者。惟陸氏為最。系出媯姓。自元伯公仕漢為豫章
都尉。逮唐有象先。景融。敬輿。諸公。皆為一時名相。勳
烈載在史氏。疏奏炳于冊書。學者讀其文。徵其行事。
寤寐仰止。至宋象山公。闡明聖道。當諸子支離汗漫
之際。特揭性宗。與程朱二氏。互相標舉。為世大儒。枝
盛金谿。四世孫文遠公。登宋開慶元年進士。自江右

官嘉湖巡使。卒于任。贈少保。遂葬當湖鎮。其子孫因家焉。是爲當湖始祖。今平湖縣基卽其基地也。明宣德中建縣治。遷墓于邑之趙家浜。今三百餘年矣。名魁顯秩。盛于明而奮起。

與朝者。蟬聯斐亶。號稱縣西陸氏云。今侍御君諱光旭。由壬辰進士。起家保定令。有最聲。恭逢

世祖章皇帝大計羣吏。褒舉卓異。寵以異數。尋授陝西道試監察御史。抗章論事。直聲震于

廷。有真御史之目。繼轉山西分守冀南道左叅議。宦績

尤著。余家世與陸氏譜籍婚媾。氣誼良深。而余與侍御。復有一日之雅。夙知其封翁天全公。能教子有成。迄于筮仕。敷歷中外。賢聲著聞。皆封公教也。今年冬。侍御君卜地于某山之陽。塋有日矣。廼以其封公之行實。來乞余銘其墓中之石。辭意勤懇。若非此無以慰封公于地下者。余雖不敏。其烏敢辭。謹按狀。公姓陸氏。諱本。字號天全。自文遠公。歷數傳爲南溟公。任南康司馬。政績懋著。崇祀名宦。南溟公生大中丞仲鶴公。明嘉靖間。開撫江右。平番撫寇。罷役賑飢。

建有偉伐軍民畫像祝之。居官三十餘年。尤以清操著。並祀名宦鄉賢。公曾祖也。仲鶴公三子。長曙新公。太學生。孝友。彰譽公之祖也。曙新五子。長自還公。邑廩生。有文名。屢中副車。早世。生子二。長卽公公。生而敏穎。五經諸史。過目成誦。久之不忘。爲人重默謙謹。寡言笑。終年惟事書史。一室之外。足跡不至。弱冠補博士弟子員。名噪文壇。每試冠軍。學憲博菴黎公。及直指趙公。皆以國士目之。咸謂掇巍科。猶拾芥耳。不意數奇不偶。卒困場屋。今人之從事藝林者。始不禁

其躡取躁進之思。繼復不勝其怨尤困頓之想。而公以盛名之下。義命自安。曾不以幾微得失。介于其懷也。自還公中年抱疾。不離牀褥者三載。公扶持寢所。省視藥餌。侍候安否。臥不解帶者三年。如一日。繼而禱藥罔效。哀毀骨立。幾不欲生。居苦次。易戚中禮。以篤孝著稱黨里間。時公方弱冠。弟年止十五。妹纔九齡。煢煢高堂在上。落落藐孤在下。仰事俯育。公以一身肩之。零丁孤苦。備嘗艱阻。乃公惟酷守硯田。以館穀供色養。每令節遄歸。晨昏甘旨。必備必虔。堂上爲

之解頤。至爲弟妹謀婚嫁。勉力拮据。出孺人奩具以佐之。各得成立。嗣後邑遭兵燹。廬于墓所。未幾又寄居外氏。轉徙化離。公奉母寧居。不違膝下。因祠在墓所。凡歲時伏臘。必隻身赴之。洗爵拜奠。極其誠敬。縱風鶴偶驚。道途梗阻。曾弗愆期而止焉。公之孝友。性成有如此。自是公學業益進。名稱益盛。負笈從遊者。日以益衆。門下士盡一時名流。公雖未得一展其夙負。亦足云貧士攻苦中教育英才之一樂也。獨念家聲未振。先志未酬。每偕諸子篝燈風雨之下相對。吞聲淚不禁涔涔下。迨侍御君于卯辰之歲。聯第南宮。公于是始得稍展其罔極之思。而家居寒素。仍不易故常。侍御初令保定。公以書勉之曰。寒士幸第。不可有負。

國恩。聞保定邑小民貧疾苦最甚。必爲之父母者。一塵不染。乃爲真愛民。愛民乃以報國。若吾在家。饘粥可給。甚毋念菽水也。迨戊戌春。公至保署。廉知居官多善政。邑中大治。騰聲滿野。公居署期年。時爲色喜。歲丙戌。侍御以奏最上考。

天子嘉焉。特簡臺班。時侍御君回首鄉關。倚門望切。竟策蹇馳歸。承歡僅兩月餘。公旋趨侍御還。

朝謂爾既備位諫官。不可逗留家園。凡天下之得失。民間之利病。與夫

社稷之大計。當惟所見聞。蹇蹇諤諤。以竭忠盡職。于是侍御受教。惟謹。一入班行。凡有建白。直置功名性命于度外。抗節廷諍。能言人所不能言。不敢言蒙

世祖章皇帝嘉納。蓋忠優容。骨鯁更爲之曲。施妙用。保護直臣。于是侍御有外移汾晉之役。則公又教之曰。監

司一方之表。小民之休戚。係焉郡邑之則效。視焉其必廉以率屬。慈以恤民。無愧于地方。斯無負

朝廷內外兼轉。期收實用之至意。且吾家上世以來。素稱清白吏子孫。不可有玷先德。侍御奉教如前。及期報最。覆准稱職。信至。公大喜慰。時侍御因兩弟患病。定省乏侍。決意陳情。疏再上。

天子推恩。准予歸養。于時適遇改給恩典。

綸綍輝煌。觀者填巷。咸嘖嘖歎羨。不以爲侍御蒙恩之榮。而羣頌公盛德之報云。公生平性甘澹泊。堅持樸

素終其身布衣蔬食。不以境遇窮達稍渝其常。出入州閭間。暑不蓋。行不輿。足不入公府。凡諸戶外事。絕不與聞。以故當事式矜。鄉飲大典。特徵重焉。公于宗族戚里間。雅意敦睦。諸凡推解施恩。息紛捍患。孜孜焉。如恐不及。有從弟絕嗣。公依禮以長子光胤嗣。而仍以遺產盡析族之貧者。曰。吾豈忍以手足不幸。因之爲利也。至如族之孤而無依。寡而守志者。粟肉相繼。周卹有加。居恒言。不妄發目。不邪視。遇人善。則獎掖之。不置。遇人失。則教戒之。甚至吁嗟痛惜。不啻身受。房闈中不畜一媵侍。每偕二二三老友。結廣生會。托志祇園。悠然于白雲蓮社之間。丁未暮春。念婚娶已畢。自言曰。諸事皆完。可放心無一外念矣。至十四日夜。囑家人豫備拈香。時公方起居無恙。家人習以爲故常。初未介意。次早拈香各祠畢。是日值清明節。督家人種蓮花紅白各半。啜茗一杯。端坐椅上。竟脫然長逝矣。衣冠整肅。端坐如故。異哉。公年來每語諸子曰。吾見人臨去病楚。至爲可憎。我去當與人異。果應斯言。公之去來。殆有所以自主者乎。嗚呼。按公之一

受房闈中不畜一媵侍。每偕二二三老友。結廣生會。托志祇園。悠然于白雲蓮社之間。丁未暮春。念婚娶已畢。自言曰。諸事皆完。可放心無一外念矣。至十四日夜。囑家人豫備拈香。時公方起居無恙。家人習以爲故常。初未介意。次早拈香各祠畢。是日值清明節。督家人種蓮花紅白各半。啜茗一杯。端坐椅上。竟脫然長逝矣。衣冠整肅。端坐如故。異哉。公年來每語諸子曰。吾見人臨去病楚。至爲可憎。我去當與人異。果應斯言。公之去來。殆有所以自主者乎。嗚呼。按公之一

生于力學績文。絕怨尤。想于與人接物。無彼我想。于愛親友弟。不以常變或渝。于睦族。卹貧。不以疎親。稍間于教子事君。必倦倦于矢忠無二。于死生大故。又灑灑然。能毫無牽累。若此。然則天雖嗇其遇。未始不豐其報也。家有令子。

朝有直臣。生不貪戀。歿無疾苦。公真全始全終。爲天地間之完人哉。是足以不朽也已。爲之銘曰。

當湖之陸。代有哲人。宣公匡濟。唐祚中振。象山理學。聖道孔醇。千百年來。德業瀾綸。有公嗣武。奕葉相仍。

績行讀書。克紹厥祖。孝友律身。訓兒報

主。直聲雷轟。光昭世譜。煌煌

寵綸。天實報公。賢胤鵲起。如日方中。一生篤履。千載高風。垂之貞石。與天壤同。

山東提學僉憲劉君何實暨安人高氏金氏合

墓誌銘

皇清康熙三年夏五月山東提學按察司僉事劉君何

實卒于官越明年冬歸葬於淮安郡城之南郊余往

而哭之其仲弟芳譽季弟芳澤率其幼孤鬱以狀來

請余銘其墓嗟乎余何忍銘何實也始余有季女慎

擇配得何實於京邸知其文能為古處知其人卓然

思自立遂以字焉及余女于歸後即隨何實官京邸

余女竟以產殞荏苒十餘年何實之視余猶余女之

至今未亡情誼纏綿不啻十餘年如一日也。而何實又忽奄逝嗟乎。余何忍不銘何實也。按狀劉氏世居淮上爲著姓其先世多碩德代有偉人科甲蟬聯自其王父以及何實父子祖孫相繼成名進士聲聞赫奕江淮間何實爲方伯任先公長子諱芳聲何實其字號山逋別號未來僧生而穎異美丰儀稍長嗜學能文名藉甚一時先達早已器重之謂劉氏子非凡兒比也弱冠補博士弟子員時方伯公司牧潼川理懷慶何實定省偕焉凡所至處必紀其山川風土人

物以考究地勢之險易民俗之囂淳與夫名勝往蹟不禁留連感歎見諸紀咏歲甲申南北間阻任先公方官恒山日夜號泣思所以探二親者乃奮身不顧携二老僕爲丐裝匍伏于荒榛斷垣白骨青燐者二十餘日瀕死數四卒獲骨肉完聚省覲無恙人人嗟異咸以爲孝思之感云乙丑試北闈由國學生魁戴經已丑舉進士庚寅授刑部主事未數月方伯公卒于里舍徒跣奔訃抵里日哀毀骨立痛不欲生又慮遺母夫人憂茹悲飲泣勉奉晨昏曲盡孝養讀禮之

餘葺先世鉢池別業。課兩弟讀書其中。以兄而兼師。今仲季二君行成名立。見重鄉閭者。兄之教居多也。析所遺產。皆均予仲季。不足則以已所置產益之。其孝友篤摯。視貲產悉身外物。爲今人所難能者。有如此。服闋補前職奉

簡命畿北審決。時草昧初闢。犯法者衆。未免崇尚文網。獄多寃滯。君殫心平反。多所全活。尤慮

朝廷矜恤之仁。不能徧及海內。特疏請蘇理刑獄。其略曰。據畿北各府解到重囚全冊。京詳在案者。止有五

起。餘係督撫按批行候決。順永保河四府。共計不下二三百起。蓋以未經京詳。例不與審錄。及備查全招。係順治元二三年者極多。彼時當初創事。鮮定例。州縣印官。半係委署代庖。以故招詞中。游移參錯。情罪多有未協。卽如臣等昨日公審。斬家新一起。不過據隣里公舉內一款。指稱姦故叔之妻王氏。而問官不加詳察。竟擬重辟。及再四研訊。其叔斬廷篆現在口。供伊妻于崇禎年間物故。而公舉在順治二年。無論事出影響。抑且非本人告首。時雖經部議。乃止。憑原

奏覆核。不料其誣枉至此也。頃已同撫臣具題。想荷
睿慈洞鑒矣。以此推之。天下之沉抑冤滯。幽囚獄底者。
不知凡幾。臣部雖力期明允。亦安從察核。俾明罰。敕
法之中。仰副

皇上解網泣罪之深仁哉。伏乞

敕下法司。將十年來重囚積案。作何清理。務期無縱無
枉。盡破積習。並祈嚴飭。後來問刑各衙門。凡遇擬定
重案。酌定限期。通行京詳。倘有沉閣不奏者。許臣部
查違限遠近。直行叅究。庶幾情真者。偷生無路。冤抑

者。伸雪有期。于以彰國法而沛

皇恩亦深。裨治道之一端也。疏聞。奉有據奏。畿北各府
重犯獄情。未經京詳。竟至二三百起。多係元二年舊
案。招詞叅錯。情罪未協。以致沉滯獄底。無由申理。承
問各官。好生可惡。着察議具奏。以後各督撫及問刑
衙門。一應獄情文卷。未結的務。作速審明。不得延緩。
重滋冤獄。如再有久不奏詳的。察來處治之。

旨。于是特遣恤刑諸臣。分讞天下。君首在選中。旣已
陛辭。因便道省母。偶先其曹。一日行會。有忌君才者。借

端沮抑鑄一級。改任閑曹。君無幾微不平之色。每語人曰。吾先人職刑曹。兼攝數司。用法平恕。爲時倚重。吾以簡刑。紹先績。一官足惜乎。嗣陟計部。權關九江。時關務廢弛。積弊滋生。又值海氛初靖。賈舫不前。君釐剔陋規。清察破冒。商旅雲集。國課用舒。及事竣。報滿道經里門。囊橐蕭然。蓋毫釐不以自私。故商民便之。後視篆浙江司。時兩浙紳士。誤名逋糧。案內者。殆幾千人。爲之覆核。伸雪。賴以解免。壬寅冬。視學山左。毅然以興起斯文爲已任。時案牘盈几。多係諸生欠

糧事前此因

新令嚴切。槩置除名。君日取前案。親加質詢。諸生環向泣訴。以遭時不辰。田宇荒蕪。饑寒死徙。十室而九安。敢抗負。與上官忤。設有家產可貨。妻子可鬻。亦皆久已完。公保旦夕命矣。君不覺哭失聲。因長跪督撫力求保全。更申飭郡縣。以愛養士子之道。毋輕以一紙文書擲人。畢世功名。又諭諸學校。勗以忠孝禮義。俾相勸勉。急公諸生。無不頂頌。心折。癸卯錄遺才。廣收精拔。一矢公明。務免遺珠之歎。是榜售者。竟居其半。

文譽爲之益彰。後校士東昌。時當文制初更。敦尚實學。一字一句。必細加校讐。不輟丙夜。因積勞成疾。猶扶病武試。事竣病劇。遂至不起。卒于公署。遠近諸生聞之。奔走號泣。如痛私親。至設位以奠。歛錢以祭。闔郡紳衿。復追思愛慕不已。列其善狀。以請于督撫。監司暨郡邑大夫。學博士。遂崇祀名宦。嗟乎。此亦可以卜其服官之素已。居官而德于其民。獲祀于其地。不易得也。爲學使者而德于其士。獲祀于其地。尤不易得也。先是九江竣事。嘗布服芒鞋。探匡廬奇勝。經月

忘返。輿隸覓官無從得。山中人傳爲佳話。居家唯杜門卻掃。不問戶外事。時而焚香默坐。時而滌硯揮酒。偶客有相對愜意者。雖終日無倦容。否卽達官貴人。欲一望見不可得。雅志一緇一鉢。向山巔水涯。投老而終焉。故有未來僧之號。此其夙根所植使然也。而竟不獲一遂其志。嗚呼傷哉。君爲文不徇流俗。偉然自樹一家。詩法中盛。書法亦雋。潔可愛。有鉢池集。尚未彙梓行世。惜宦遊未久。弗克展其大業。然一爲司寇。郎則平反有聲。積陰德無算。一爲學使者。則能服

齊魯多士之心。而爲之畫像立祠。永光俎豆。視宦成一世。而泯泯無聞。卒之與草木同腐者。不大逕庭哉。嗚呼。君享年雖未永。而立身居官。炳炳烺烺。若此。是亦足以不朽也已。君生於萬曆庚申年十一月十二日。卒于康熙甲辰年五月初八日。享年四十有五。元配高氏。生自望族。勤儉恭敬。閭德著聞。卒能以組紉佐讀。相夫子早登賢書。生于庚申年十月十一日。卒于順治戊子年五月十三日。享年二十有九。繼配金氏。卽余女也。余宦遊楚豫。留侍嫡母朝夕。克諧親志。

及于歸後。柔順敬共。甚得姑嫜歡心。隨夫子宮京邸。聿彰賢勞。惜乎其厄于算也。生于己巳年四月十六日。卒于順治七年七月十二日。享年二十有五。又繼娶張氏。前隆慶辛未。鼎元諱元怵公孫女子一。鄮。聘順治己丑。進士兵部武選司員外郎黃公諱宣泰次女。係張出女六。長適孝廉高公諱士登。孫邑庠生祖從。次適順治壬辰進士戶部郎中周公諱龍甲長子。邑庠生楊係高出。次字順治己丑進士陝西道御史何公諱丞都長子。次字甲戌進士吉安府知府。

葛公諱維垣長孫
次俱幼。係張出。今以康熙四
年十一月二十六日。葬於郡城南郊之楊家莊。兩安
人。祔焉。銘曰

淮有名族。劉氏是彰。哲人代生。衍胤發祥。三世魏科。
何實繼後。維我何實。終孝且友。乃官秋曹。伸寃拔滯。
奏請蘇理。

皇帝曰。可。仁慈徧施。克紹先績。怡然受毀。遑恤鐫級。轉
擢計部。權稅九江。釐奸除弊。惠顧旅商。註誤逋糧。慎
加覆核。浙人曰。嘻。微公曷白。視學東海。斯文用興。憐

才悼士。赫赫著聲。胡天不畀。竟卒于官。俎豆百世。徵
德之全。惟君盛年。自號曰僧。暨君之歿。卒無牽攬。歐
陽平允。篤生文忠。仁人有後。百祿宜鍾。淮城之南。松
栢蒼蒼。我銘其實。千載弗央。

金文通公集卷之

終

金文通公集卷之二十一

吳江金之俊豈凡著

贈承德郎四川順慶府通判前山西河東鹽運使司教授湛源秦公暨太安人郝氏合葬墓誌銘

康熙二年歲在甲辰夏六月古邾水心秦公由西蜀別駕遷司馬來佐我蘇居子午要衝凡師旅往來郵

